

12,733 rumah untuk tentera

Oleh **AHMAD FADHLULLAH
ADNAN**

utusannnews@mediamulla.com.my

KUALA LUMPUR: Kerajaan mengumumkan sebanyak 12,733 unit Rumah Keluarga Malaysia Angkatan Tentera (RKMAT) baharu akan dibina menerusi lima fasa dari 2023 hingga 2030.

Perdana Menteri, Datuk Seri Ismail Sabri Yaakob berkata, perkara itu antara tumpuan yang akan diberi dalam Rangka Tindakan Perumahan Kementerian Pertahanan 3.0 (BP3.0).

Beliau berkata, BP3.0 merupakan agenda perumahan menyeluruh bagi menambah baik aspek kebajikan warga Angkatan Tentera Malaysia (ATM) termasuk veteran dan warga awam yang mendukung aspirasi Keluarga Malaysia dalam melestarikan kebajikan warga kerja Pertahanan.

“Rangka tindakan ini akan memastikan perancangan Agenda Perumahan Kementerian Pertahanan yang bermula dari tahun 2022 hingga 2030 dapat dilaksanakan dengan teratur.

“Ini seterusnya dapat menjamin kemudahan perumahan kepada warga kerja pertahanan yang telah banyak menyumbang bakti kepada kedaulatan negara dan paling banyak ber-



ISMAIL Sabri Yaakob bersama Hishammuddin Tun Hussein melihat buku khas untuk Perdana Menteri dalam Majlis Pelancaran Blueprint Perumahan 3.0 Kementerian Pertahanan di Kuala Lumpur semalam. - UTUSAN/MOHD. FARIZWAN HASBULLAH

korban demi membela keselamatan Keluarga Malaysia,” katanya di sini semalam.

Beliau berkata demikian ketika melancarkan BP3.0 Kementerian Pertahanan di Dewan Perkesa, Wisma Perwira ATM yang turut dihadiri Menteri Pertahanan, Datuk Seri Hishammuddin Hussein.

Pelaksanaan Blueprint Perumahan 1.0 yang dilancarkan

pada 2017 dan Blueprint Perumahan 2.0 pada 2019 menyaksikan sebanyak 4,200 unit RKMAT baru berjaya disiapkan dan diduduki.

Menurut Ismail Sabri, kaedah-kaedah perolehan secara penswastan seperti ‘bina-pajak-senggara-pindah’ (BLMT) atau pertukaran tanah akan diberi pertimbangan agar sebahagian besar matlamat BP3.0

dapat dicapai.

“Di bawah program selenggara dan naik taraf, sasaran 80 peratus daripada 7,292 unit RKMAT sedia ada akan dinaik taraf termasuk pengubahsuaian daripada dua unit kepada satu unit. Pada masa yang sama, perabot lama yang telah rosak akan diganti dengan perabot yang baharu.

“Di bawah program Inisiatif Perumahan Veteran ATM, sebanyak 1,700 unit akan dibina demi kesejahteraan veteran ATM di seluruh negara.

“Dalam masa yang sama, lebih banyak rumah akan diselenggara dengan nisbah sasarannya satu unit baru dibina, empat unit akan dinaik taraf,” katanya.

Ismail Sabri menambah, memandangkan perancangan BP3.0 cukup besar dan meluas, ia bukan sahaja menuntut komitmen dan kesungguhan yang tinggi, malah memerlukan kerjasama yang erat daripada semua pihak yang terabit.

“Matlamatnya adalah memastikan lebih banyak RKMAT dibina dan diselenggara, lebih banyak rumah mampu milik dibina dan lebih ramai veteran ATM diberi rumah baru dan ditambah baik kediaman sedia ada,” katanya.